

豫

章

焚

書

第二五册

樂

章

樂

章

樂章

竹枝惡酒

柔一老

丁卯冬月
于南昌復廬

竹林愚隱集目錄

嘉定壬午六月五日輪對第一劄

第二劄

嘉定甲申正月二十二日輪對第一劄

貼黃

甲申擬對第二劄

寶慶乙酉八月二十二日應詔上封事

上丞相史彌遠書

象州祭弟利用行十八文

附

補宋史胡夢昱傳

竹林愚隱集

宋 吉水胡夢昱 撰

嘉定壬午六月五日輪對第一劄

臣一介謬庸備數李寺循次陛對自幸遭逢越職獻言輒忘狂僭幸陛下容納焉臣仰惟陛下以純誠事天嚴恭寅畏是也以實德格天寬仁勤儉是也以陛下之操守踐履無一毫人偽介乎其間明白洞達真可對越在天故臨御以來變故之更厯者不知其幾試以大者言之外而強藩之跋扈人皆曰此唐之淮蔡也雷厲風飛不旋踵而誅之內而權臣之根據皆

曰此漢之梁氏也天開日明一反掌而去之斯二者
非人力所能與也天也昔之轉禍爲福轉危爲安者
無一非天邇者鎮寶之彰彰來歸輿地之寢寢自復
者又何往而非天抑臣聞之承天眷之已至者易迓
天眷于方來者難鎮寶之歸天也然講東都之會而
使夷夏之玉帛交歸者此其兆也輿地之復天也然
雪南渡之恥而使祖宗之境土盡復者此其占也興
復之祥天方畀之興復之運天方啟之臣願陛下愛
惜日力而以歉然不自足之心應之上下戒于驕盈
內外懲于玩愒以事機易失爲深慮以事力未奮爲

深恥以事變叵測爲深憂滌蕩振刷之意日新于一
日經營圖治之功日加于一日則天之啟迪陛下者
豈特如今日可觀而已江甯獲寶晉惟哆然自足也
卒無以大規恢之業河湟歸土唐惟哆然自足也卒
無以收振起之功往事亦可鑒也書曰惟王受命無
疆惟休亦無疆惟恤惟陛下兢兢而亟圖之傳曰責
難于君謂之恭臣不勝惓惓

第二劄

臣聞謀國者不可有所玩天下之患常伏于所玩秦
以慕容垂爲不足慮而玩之秦之患卒生于垂梁以

侯景爲不足疑而玩之梁之患卒生于景方今天下
所通患者垂亡之勢也此患之顯于有形者也臣竊
以大勢而逆料之其亡之遲速未可知而終于必亡
爲可知蓋其兵力銷于戰傷民力疲于轉餉才力饋
於應辦外示強大之形內感危亡之證釜魚幕燕視
蔭幾何國家之患終不在心腹臣之所患者則山東
歸附之衆是也此則患之隱于無形者也當其歸附
之初國論譁然或有養鷹鷂去之疑或有養虎遺患
之懼陛下斷斷然推赤心以待之果能竭知勇以報
我傾忠誠以附我緩急惟命令是聽平居惟紀律自

安昔焉以爲可疑者今固不足疑矣然玩之而不復
爲之防可乎昔焉以爲可懼者今固不足懼矣然玩
之而不復爲之慮可乎陛下廟謨明照固足以消其
奸宄之謀大臣邊籌深密必有以杜其奸宄之謀秦
梁之變萬萬無之抑臣之私憂過計則深以爲不可
玩焉蓋我之阻隘彼盡知之我之虛實彼盡熟之生
聚日繁溫飽難適希覬日重怨怒易生首領縱無他
志偏裨甯肯協心苟不先時而爲之隄防隨時而爲
之操縱卒然有變何以制之夫此輩平昔之所自負
者特以其勇于戰鬪而王師莫能及之臣竊聞淮甸

之所藉以禦者民兵之力居多而官兵之怯特甚今
莫若汰官兵之老弱覆官兵之虛籍就移其廩給以
資民兵焉合其強壯者而教閱之擇其英傑者而統
率之畧復其租賦常寬其徭役以優假之將見官兵
之在籍者日精民兵之附籍者日衆有大牙相制之
形無尾大不掉之患彼自有所顧忌而不敢妄生
邪念矣臣所謂先時而隄防者此也夫此輩平昔之
所不滿者其志每在于攻取朝廷則不欲其生事而
禁約之臣竊謂仇敵未有滅亡之日邊戍未有撤還
之期以守爲守不若以戰爲守官兵民兵養威持重

以待而時遣歸附之兵乘間以其撓焉聚則散散復聚或持其急或擣其虛知噐所以困楚王朴所以取淮其策蓋出于此滅則有分地可以處之未滅則此輩之狠心勇氣有所發泄終不至于蓄而生變焉臣所謂隨時而爲之操縱者此也隄防操縱而盡其道非特可以消患于未形而患之顯于有形者亦不足慮矣臣之愚慮近乎迂臣之過計近乎拙惟陛下採曲突徙薪之說持履霜堅冰之戒與大臣兢兢亟圖之宗社幸甚

嘉定甲申正月二十二日輪對第一劄

臣李寺之賤有司也惟刑讞是評其于當時之大務
詎敢出位而妄言然忠誠所激有勃勃而不容遏者
輒昧死爲陛下陳之臣聞漢臣董仲舒之策曰國家
將有失道之敗天乃先出災害以譴告之不知有省
又出怪異以警懼之尙不知變而傷敗乃至以此見
天心仁愛人君而欲止其亂也陛下之嚴恭寅畏天
實鑒之陛下之寬仁勤儉天實知之矧簡畀之方隆
宜休祥之洽至然災異之來未有如故歲之數者遠
郡之旱近郡之水京畿之火譴告亦旣諄諄矣繼以
日蝕之變又繼以冬雷之變迺若星隕于西北有光

如電有聲如雷則尤異之大者仰窺天意俯察人事
謹告未已而警懼繼之者其故果安在也臣竊思之
殘賊未殄報復必深禍所伏也新令方張窺窬難免
禍所伏也歸附之衆情態叵測禍所伏也驕蹇之卒
輒肆翦搖阻饑之民間行剽劫禍所伏也禍機伏于
隱微之中而未發焉蓋賈誼所謂痛哭者也奈何習
俗惟玩愒自耽人情惟苟且自溺久安長治之策尙
缺于建明防微杜漸之計或疎于植立竊意天心仁
愛陛下之深惟恐禍機之發而傷敗至焉此警懼所
以不厭其數也以故歲天災流行若此繼自今以往

陛下無徒區區爲荒政之講火禁之修而已盍亦逆
計事變而思膏澤有當霈者歟橫流有當遏者歟曲
突徙薪之謀有當謹者歟以故歲之變屢形若此繼
自今以往陛下無徒屑屑然齋心膳素露立默禱而
已盍亦推測端倪而思離明之或蔽歟渙號之或愆
歟星拱之邦或有陰懷不靖者歟書曰王省惟歲陛
下臨御之歲今又新矣政當以故歲之灾異而深省
之易曰履霜堅冰至言慮患貴乎早也詩曰迨天之
未陰雨徹彼桑土綢繆牖戶言防患貴乎預也今日
轉禍爲福轉危爲安于以消弭灾異于以迎迓休祥

願陛下之施行如何耳昔范純仁進言于神宗皇帝
朝以爲郡邑之弊守令知之一路之弊職司知之茶
鹽利病民兵刑法差役之弊提其局及受其害者知
之軍政之弊主帥與將領知之邊之弊守邊知之伏
望特下明詔申勅中外各使條陳本職限一月聞奏
然後審擇而行之此蓋救時之切論也臣敢撫之以
爲陛下獻願陛下謹天之戒畏天之威鑒已往愆方
來與二三大臣競競亟圖之若夫三白已見一稔可
期固自可以占陛下獻歲之祥臣猶嚙嚙然以故歲
之灾異言之可爲不識忌諱之甚者惟陛下矜其嫠

不恤緯之憂而赦之

貼黃

臣生長莊農竊知所在賦額虧陷而作邑者有湯火煎熬之歎役訴紛紜而充役者有破產代輸之苦其蠹弊之源蓋有在焉諸縣之書手是也臣耳目所接如江東西諸縣所謂書手者官無一錢一粟請給及之然聖節敷買之糜費取辦焉監司過往之供應取辦焉佐官白直之傭雇取辦焉甚至縣官宴集之需送迎之具亦取辦焉其他百色誅求猶有不吝縷數者夫既空役其身以服勞于官而又虛取白撰以應